

Usluge Saveza

• PRAVNO SAVJETOVALIŠTE:

Selma Fišek, viši saradnik za pravna pitanja

fax: + 387 33 552 810

selma@sogfbih.ba

• FINANSIJSKO SAVJETOVALIŠTE:

Dženita Kovačević, viši saradnik za finansijska pitanja

fax: + 387 33 552 810

dzenita@sogfbih.ba

Sadržaj biltena:

Savez započeo sa realizacijom ciljeva iz Strategije obuke za JLS	1
Održan sastanak o unapređenju komunikacije kantonalnih i lokalnih nivoa vlasti	2
INTERVJU: Suad Omerašević, načelnik Općine Zavidovići	2
Ugledni 'The Economist' objavio priču o ekonomskom uspjehu Goražda	4
INTERVJU: Sanel Buljubašić, načelnik Općine Srebrenik	5
Interna provjera sistema kvaliteta u Općinskim službama Općine Centar Sarajevo	6
Završena digitalizacija katastra u Općini Cazin	7
INTERVJU: Emir Bubalo, načelnik Općine Konjic	7
Nova ulaganja u prehrambenu industriju u Živinicama	10
U Tešnju od 11. do 14. aprila sajam privrede "BIZNIS 2013"	10
Ja biram goste sa Vesnom Travljanin	11
NALAS anketa: Ispitivanje potreba za izradu platforme za spajanje JLS i biznis sektora	11
NAJAVA svečane ceremonije dodele Beacon priznanja	11
WBI organizuje on line obuku 'Ulično adresiranje i upravljanje gradovima'	12
LAF Study Tour on EU Entrepreneurship and SME policies at local level	12
Općine koje obilježavaju svoj dan u mjesecu aprilu/travnju	13

Bilten Saveza općina i gradova Federacije Bosne i Hercegovine

SAVEZ ZAPOČEO SA REALIZACIJOM CILJEVA IZ STRATEGIJE OBUKE ZA JEDINICE LOKALNE SAMOUPRAVE

Savez općina i gradova Federacije Bosne i Hercegovine je, u skladu sa Strategijom obuke za jedinice lokalne samouprave u Federaciji Bosne i Hercegovine 2011. – 2015. godine, koju je usvojila Vlada FBiH i nadležna tijela Saveza, započeo sa edukacijom izabranih zvaničnika u jedinicama lokalne samouprave, putem organiziranja niza seminara za općinske vijećnike. Prvi ciklus je počeo u decembru/prosinu 2012. godine, kojom prilikom je održano šest seminara - u Visokom, Vitezu, Jajcu, Olovu, Varešu i Bugojnu, a za ovu godinu planirano je da se održi više od trideset.



Sa seminara u Konjicu, 21.03.2013. godine

Seminar za općinske vijećnike **Konjica** održan je 21. marta/ožujka, a ugovoreni su također i seminari za još pet općina, i to: **Donji Vakuf** (30. mart/ožujak), **Goražde** (1. april/travanj), **Ilidžu** (2. april/travanj), **Pale-Praču** (3. april/travanj) i **Maglaj** (6. april/travanj). U toku je priprema seminara za općine **Kladanj**, **Busovaču**, **Zavidoviće** i **Žepče**.

Tokom seminara, općinskim vijećnicima se pruža prilika da se upoznaju sa normativnim okvirom i nadležnostima lokalne samouprave, zatim će moći steći polazno razumijevanje strukture i mehanizama funkcionisanja lokalne vlasti, posebno vodeći računa o odnosima između vijeća i načelnika općine kao najvažnijih aktera lokalne vlasti. Također, ovladat će osnovnim elementima upravljanja budžetom, tako da mogu da se kompetentno uključe u donošenje budžeta za sljedeću godinu, te će steći podsticajan uvid u izazove i prednosti lokalne demokratije, saradnje sa građanima i nevladinim organizacijama.



Sa seminara u Visokom, 7.12.2012. godine

povjerali građani.

Seminari se održavaju uz finansijsku pomoć OSCE-a i UNDP-a kroz projekat MTS (Sistem obuke za jedinice lokalne samouprave) koji finansira Švedska agencija za međunarodni razvoj i saradnju (Sida).

U okviru seminara svim učesnicima će biti uručen priručnik „Lokalna uprava od A do Ž – Vodič za novoizabrane lokalne zvaničnike“ kao polazni materijal za obuku lokalnih zvaničnika – (grado)načelnika jedinica lokalnih samouprava, njihovih zamjenika, vijećnika u Bosni i Hercegovini – kako bi stekli solidan uvid u funkcionisanje lokalne samouprave, koji će im omogućiti ispunjavanje uloga i odgovornosti koje su im



Organization for Security and
Co-operation in Europe
Mission to Bosnia and Herzegovina

KORISNI LINKOVI ZA PREDPRISTUPNE FONDOVE EU:

www.southeast-europe.net
www.adriaticpacbc.org
www.interregadriatico.it
www.europa.ba
www.chib-eu.org
www.cbc-bih-mne.org
www.srb-bih.org
www.cbc-cro-bih.net
www.programmemed.eu
www.tacso.org
www.euroinfocentar.ba
www.balkanfund.org
www.eurelsmmed.com
www.eacea.ec.europa.eu

ODRŽAN SASTANAK O UNAPREĐENJU KOMUNIKACIJE KANTONALNIH I LOKALNIH NIVOVA VLASTI

Misija OSCE-a u BiH i Vlada Zeničko-dobojskog kantona, u zeničkom hotelu Dubrovnik, upriličili su sastanak posvećen unaprijeđenju vertikalne komunikacije i koordinacije između kantonalnih i lokalnih nivoa vlasti, navodi se na web stranici Općine Breza.

Nakon uvodnog obraćanja kantonalnog premijera Fikreta Plevljaka i zamjenika direktora Odjela za ljudsku dimenziju Misije OSCE-a Luca Lietaera, svi članovi Vlade i načelnici općina ZDK, razgovarali su o poboljšanju međusobne saradnje i načinima izrade učinkovitijeg sistema komunikacije.

Predstavnici OSCE-a naglasili su, kako je jedan od osnovnih ciljeva njihovog rada, sa kantonalnim skupštinama, kao i lokalnim institucijama, podizanje nivoa odgovornosti prema građanima na viši nivo.

Na sastanku se obratio i načelnik Općine Breza Halil Tuzlić. On je istakao kako su najveći problemi

za Brezu infrastrukturni projekti, putevi, vodovodi i kanalizacije, te koliko će se za iste moći izdvojiti sredstava sa viših nivoa vlasti. „Kandidirali smo nekoliko projekata i uputili prema Zeničko-dobojskom kantonu, te očekujemo podršku, s obzirom da prethodnih godina Breza nije dobivala dovoljno sredstava za infrastrukturu. Krivicu za to velikim dijelom snose i lokalne vlasti, koje često nisu ni aplicirale za sredstva“, istakao je načelnik Tuzlić, te dodao „ne mogu a da ne spomenem naučno-obrazovni park, u sklopu kojeg je napravljena laboratorija za izvođenje praktične nastave, vrijedna oko 300.000 KM, a zbog jednog radnika koji treba biti uposlen, ne radi. Neke generacije neće imati priliku da izvedu praktičnu nastavu, stoga apeliram na nadležno ministarstvo da što prije uposli jednog radnika i riješi taj problem“.

Načelnik Tuzlić je govorio i o sportskoj dvorani koja se već dugo stoji nedovršena, a u koju su uložena ogromna sredstva, te apelirao na više nivoa vlasti da finansijski pomognu njenu izgradnju, „jer bilo bi lijepo da se i oni prema svojim mogućnostima uključe u finalizaciju ove dvorane, koja bi uistinu bila jedan dragulj za ovaj grad ali i za cijeli kanton“.

„Svi smo jedna cjelina i moramo osigurati bolje uvjete života građanima ZDK. Zahvaljujem ministrima koji su nas nedavno posjetili i pozivam i ostale da dođu u Brezu i pomognu nam u rješavanju problema“, kazao je Tuzlić.



Načelnik Općine Breza, Halil Tuzlić

INTERVJU: SUAD OMERAŠEVIĆ, NAČELNIK OPĆINE ZAVIDOVIĆI

Razgovarala: Sanela KARAICA

SARAJEVO, 13. MARTA (ONASA) - Načelnik Općine Zavidovići Suad Omerašević u intervjuu za Agenciju ONASA govori, između ostalog, o planovima lokalne vlasti za naredni period, problemima sa kojima se suočava ova općina, ekonomskoj situaciji, problemima u preduzeću Krivaja i saradnji sa turskom općinom Bozuyuk.

ONASA: Na čemu će biti akcenat rada lokalne vlasti u Zavidovićima u narednom periodu?

OMERAŠEVIĆ: Namjeravam nastaviti uspostavljati pozitivne kontakte sa višim nivoima vlasti, ministarstvima i agencijama koje su često surealizatori, odnosno sufinansijeri projekata od interesa za našu općinu, kao i fondovima od kojih je moguće očekivati podršku realizaciji naših projekata, iako moram priznati da to danas, prije svega zbog veoma kompleksnih političkih prilika i odnosa, i nije jednostavno.

Ključne namjere su razvojnog karaktera, odnosno akcenat djelovanja će biti na slijedećim aktivnostima: rad na efikasnijem radu uposlenika u općinskom organu, odnosno efikasnijem pružanju usluga građanima; dodatna ulaganja i uređenje industrijske zone Ekonomija-Batvice, te angažman na racionalnoj i efikasnoj dodjeli zemljišta radi građenja; iznalaženje novih lokacija za poslovne zone putem izrade prostornog plana Općine; obezbjeđenje višeg nivoa komunalne higijene putem dodatnog angažmana davanja usluga na kvalitetu prikupljanja i odlaganja otpada na obuhvaćenom području; nastavak projekta proširenja obuhvata za organizovano prikupljanje otpada i angažman na projektovanju sanacije i stvaranju pretpostavki za zatvaranje gradske deponije.



Suad Omerašević, načelnik
Općine Zavidovići

Savez / Zajedno za uređenu i razvijenu lokalnu samoupravu

Također, cilj nam je snažniji angažman općinskog Razvojnog tima i Razvojne agencije na praćenju realizacije Strategije razvoja Općine, izradi projekata i apliciranju prema mogućim izvorima finansiranja; rekonstrukcija javne rasvjete sa stanovišta energetske efikasnosti i ušteda energije; maksimalan angažman na korištenju svih mogućnosti za izgradnju novih elemenata vodovodne i kanalizaciona infrastrukture te rekonstrukcija postojeće putne infrastrukture.

ONASA: Koji su najčešći problemi s kojima se suočava općina Zavidovići?

OMERAŠEVIĆ: Najveću težinu čini visok nivo nezaposlenosti građana naše općine što je dalje uzrok mnogo drugih problema. Neriješeni problemi vezani za preduzeće Krivaja, loš standard i težak život njenih uposlenika zasigurno snažno utiču na ukupan poslovni ambijent u Zavidovićima. Relativno mali budžet, značajno budžetsko opterećenje, stagnacija prihoda od indirektnih poreza kao najznačajnijeg dijela prihoda u budžetu općine, te sve slabija mogućnost podrške za mnoge aktivnosti iz budžeta viših nivoa su, takođe, karakteristike ovog vremena.

Iako su evidentne kontinuirane aktivnosti na izgradnji i rekonstrukciji infrastrukture, i dalje je očit problem finansiranje izgradnje i rekonstrukcije, kao i održavanje dugačke putne mreže, jer općina Zavidovići je po površini jedna od najvećih općina u Federaciji BiH. Sve učestaliji problemi u vodosnabdijevanju na značajno velikim područjima općine, te neriješeno pitanje odvoda otpadnih voda iz domaćinstava ukazuju na neophodnost značajnih investicija u ovoj oblasti.

Neadekvatan način zbrinjavanja otpada, odnosno nedopušteno odlaganje na gradsku deponiju takođe je veliki problem. Naloženi odvoz otpada na Regionalnu deponiju Mošćanica, po nekim kalkulacijama, mora prouzročiti porast troškova odvoza otpada 2,5 puta, što je za veliki broj naših sugrađana veoma težak udar na skromne porodične budžete.

Određeni broj tužbi u kojima je Općina Zavidovići tužena prijete dodatnom opterećenju budžeta i još komplikovanijom situacijom u pogledu mogućnosti finansiranja ključnih potreba građana.

ONASA: Kako biste ocijenili trenutnu ekonomsku situaciju na području općine?

OMERAŠEVIĆ: Ako hoćemo biti objektivni, ekonomsku situaciju u našoj općini moramo ocijeniti prilično teškom. Najbolji pokazatelj teške situacije je brojka od preko 7.000 nezaposlenih osoba koje se vode na evidenciji Službe za zapošljavanje. Ekonomska kriza u okruženju se dešava u periodu značajnih problema u preduzeću Krivaja, koje je u značajnoj mjeri bilo nosilac privrednih aktivnosti i zapošljavanja naših građana. Danas posljedice teškog funkcionisanja ovog preduzeća osjeti mnogo građana, cijela općina. Značajan broj bivših uposlenika ovog preduzeća ne ostvaruje pravo na penziju zbog neuplaćenih doprinosa. Veliki broj građana je u stanju potrebe pomoći. Budžetske mogućnosti su takođe ograničene, što zbog ovakvih problema privređivanja na općini, što zbog sigurno nepravilnog principa raspodjele javnih prihoda, prije svega prihoda od indirektnih poreza. Ovakva situacija negativno utiče na mogućnosti u svim oblastima društvenog života na općini, kulturu, sport itd.

ONASA: Jeste li zadovoljni stepenom zaposlenosti na području općine Zavidovići i šta općinska vlast radi na povećanju zaposlenosti, posebno mladih i obrazovanih kadrova?

OMERAŠEVIĆ: Ne možemo biti zadovoljni jer imamo više od 7.000 nezaposlenih osoba različitih dobnih skupina, nivoa obrazovanja i profila stručnosti. Općina Zavidovići je u prethodnim godinama, a što planiramo i u tekućoj, planirala sredstva i omogućila većem broju mladih visokoobrazovanih osoba sticanje početnih iskustava u struci putem odrađivanja pripravničkog ili volonterskog rada. Namjera je da se mladima omoguće bolje startne pozicije za zasnivanje radnog odnosa, kako na našoj općini tako i šire.

Radi stvaranja pozitivnije klime za poduzetništvo, smatram da je neophodno djelovati u slijedećim pravcima: adekvatno sarađivati sa poduzetnicima i stvarati partnerski odnos sa zajedničkim ciljem - nova radna mjesta i uočavanje problema i zapreka na ovom putu; sagledati sve zapreke i moguća rješenja za veću ekspeditivnost i efikasnost u procesu pokretanja poslovnih aktivnosti, odnosno pribavljanju dozvola, koje se i danas spominje kao otežavajući faktor; podržati pokretanje i održanje poslovnih aktivnosti, u skladu sa zakonom, minimalnim cijenama zemljišta i minimalnim naknadama; efikasno i pravovremeno poticati mjere u poljoprivredi i drugim oblastima te jačati razvojne agencije kao važan faktor za poboljšanje poslovnog ambijenta.

ONASA: Na koji način je, prema Vašem mišljenju, moguće riješiti probleme u kompaniji Krivaja?

OMERAŠEVIĆ: Krivaju kao sistem poznajem, poznata mi je i suština problema, mada mnogo detalja vjerovatno i ne znam. Smatram da je mogućnost upravljanja i usmjeravanja procesa u ovom preduzeću znatno ograničena i otežana nakon otvaranja stečajja. Takođe je jasno da se ne može dugo održati poslovna aktivnost u ovakvom ambijentu i da je privatizacija, odnosno prodaja imovine sa očuvanjem poslovne funkcije jedini način za uspješan oporavak ovog preduzeća. Partneri bi trebali da ovom preduzeću donesu investiciju - kapital, tržište i ozbiljnost u svim poslovnim funkcijama. Sve drugo su lažne mjere i sve drugo je izgubljeno vrijeme za ovo preduzeće, za uposlenike i za ovaj grad.



Grb Općine Zavidovići



Zavidovići



Zavidovići

KORISNI LINKOVI ZA PREDPRISTUPNE
FONDOVE EU:

www.southeast-europe.net
www.adriaticipacbc.org
www.interregadriatico.it
www.europa.ba
www.chib-eu.org
www.cbc.bih-mne.org
www.srb-bih.org
www.cbc-cro-bih.net
www.programmed.eu
www.tacso.org
www.euroinfocenter.ba
www.balkanfund.org
www.eurelmed.com
www.eacea.ec.europa.eu



Grb Općine Goražde

Za budućnost Krivaje vrijeme je veoma značajan faktor. Stoga se očekuje od stečajnog upravnika da, na osnovu kompletnog pregleda stanja, koje podrazumijeva i pozive za prodaju imovine, čim prije sačini realan stečajni plan, koji treba da podrazumijeva prodaju preduzeća u cjelosti ili u dijelovima. Samo na takav način je moguće očuvati poslovne funkcije ovog preduzeća, očuvati postojeća i stvoriti nova radna mjesta. Zavidovići ne žele da Krivaja doživi sudbinu nekih preduzeća koja su u stečaju nestajala. Krivaja danas zauzima oko 520.000 kvadratnih metara potpuno uređene i opremljene industrijske zone, stoga je ona interes ne samo 1.100 uposlenika Krivaje, nego i svih onih koji su bez posla.

Općina nema nadležnost nad upravljanjem imovinom ovog preduzeća, i zbog toga, uglavnom, nemamo mehanizme. Ali ono što možemo, to ćemo i činiti, a to je prije svega tražiti i insistirati na rješavanju, te angažirati se na promociji, odnosno traženju potencijalnih investitora. Stoga očekujemo od povjerilaca i predstavnika vlasti da budu na visini zadatka, da prihvate činjenicu da ovo preduzeće nema vrijednosti koje može namiriti sva potraživanja, ali da posredno, kroz pozitivnu poslovnu aktivnost u budućnosti, svi možemo imati pozitivne efekte.

ONASA: Kakvi su trendovi, odnosno da li imate najave otvaranja novih privrednih subjekata?

OMERAŠEVIĆ: Danas imamo slučajeve manjih investicija i pokretanja određenog broja radnih mjesta u poduzetničkom inkubatoru, od čega je i jedno strano ulaganje. Ovo treba da budu pokazatelji mogućeg načina realizacije poslovnih ideja sa relativno malim sredstvima.

Na industrijskoj zoni Ekonomija-Batvice, pored domaćih investicija u prethodnom periodu, ovih dana završava se investicija italijanskih investitora u pogone metaloprerade, što u prvoj fazi treba da rezultira upošljavanjem oko 130 osoba, a najavljuju se i sljedeće faze investicije u proširenje izgrađenih kapaciteta. Vjerujemo da će i ovo, uz postojeće preduzeće holandskih investitora koje radi već više od deset godina, biti pokazatelj da je kapital koji je investiran u Zavidoviće siguran.

ONASA: Općina Zavidovići i turska općina Bozuyuk potpisale su prošle godine dokument o bratimljenju, kojim su potvrdile spremnost za saradnju. Šta ovo znači za Općinu Zavidovići i da li je već došlo do konkretnih vidova saradnje?

OMERAŠEVIĆ: Inicijativa za bratimljenje ove dvije općine rezultat je, ustvari, već uspostavljenih kontakata na polju kulture. Poslije zvaničnih sastanaka u prošloj godini nisu ostvareni konkretni vidovi saradnje. Razlozi za to su, prije svega, izborne aktivnosti u našoj općini, ali po našim saznanjima i određene promjene u administraciji Općine Bozuyuk. Vjerujemo da ova saradnja neće ostati samo na protokolarnim aktivnostima vezanim za bratimljenje, kao ni na nivou samo kulturne saradnje.

Kako je općina Bozuyuk snažnija, bogatija, općina sa znatno razvijenijom privredom, naš interes je uspostaviti saradnju i na privrednom planu. Moguća saradnja privrednika ove dvije općine, razmjena iskustava, moguće investicije turskih privrednika na našoj općini, teme su o kojima želimo razgovarati sa administracijom Općine Bozuyuk, i nastojaćemo već ubrzo nastaviti kontakte.

UGLEDNI 'THE ECONOMIST' OBJAVIO PRIČU O EKONOMSKOM USPJEHU GORAŽDA

Ugledni britanski magazin „The Economist“ u najnovijem broju donosi priču o uspješnom poslovanju kompanija u Goraždu, sa posebnim osvrtom na kompaniju Bekto Precisa.

"Tokom rata u Bosni i Hercegovini od 1992. do 1995. godine, Goražde je bilo opkoljeno od strane srpskih snaga. Sada je poznato po proizvodima kompanije Bekto Precisa. Sa svojih 357 uposlenika, kompanija Bekto Precisa proizvodi plastične proizvode za auto svjetla za poznate svjetske brendove kao što su Porsche, BMW i Audi", navodi se u tekstu, koji prenosi reporter agencije Anadolija.

"The Economist" podsjeća na činjenicu da se BiH suočava sa stagnirajućom ekonomijom, visokom stopom nezaposlenosti i nefunkcionalnom vladom.

"Međutim, BiH ima iznenađujuće dobre industrijske klastere. Goražde, grad u istočnoj Bosni, je jedan od njih. Ali i Tešanj, Bijeljina i Visoko. Takva mjesta obično imaju vrlo dinamične načelnike i privrednike, ali i jake veze sa Njemačkom. Goražde ima sve troje", piše poznati svjetski magazin.





Ističe se da Goražde nije bogato mjesto, napominjući da su mu dobra lokacija i kvalitetna radna snaga pomogle da postane dijelom njemačke radne kulture.

"Prosječna mjesečna plata u kompaniji Bekto je 664 eura (864 dolara), što je znatno iznad prosječne plate u BiH koja iznosi 421 eura. Oko 85 posto proizvoda izvozi se u Njemačku i Austriju. Vrlo je popularna firma. Na konkurs za 30 novih radnika stiglo je oko 3.000 prijava".

"The Economist", također, piše kako su "plate i troškovi proizvodnje u Kini sigurno mnogo manji, ali vrijeme dostave iz BiH na centralno evropsko tržište mjeri se danima, a ne sedmicama. Također, kvalitet lokalnih proizvoda je vrlo dobar".

Britanski list navodi da to nije jedini izvoznik u Goržadu, podsjećajući na ASA Prevent, mnogo veću kompaniju koja proizvodi presvlake za auto sjedišta.

Direktorica kompanije Bekto Precisa Enisa Bekto izjavila je da "na čelu BiH konačno želi vidjeti nekoga ko će zemlju voditi kao što ona vodi svoju kompaniju, u kojoj se na mnogim menadžerskim pozicijama nalaze žene".



Postrojenja kompanije Bekto

INTERVJU: SANEL BULJUBAŠIĆ, NAČELNIK OPĆINE SREBRENIK



Sanel Buljubašić, načelnik
Općine Srebrenik

Razgovarala: Maja KUNDAČINA

SARAJEVO, 17. MARTA (ONASA) - Načelnik Općine Srebrenik Sanel Buljubašić u intervjuu za Agenciju ONASA, između ostalog, govori o radu lokalne vlasti u narednom periodu i problemima sa kojima se suočava, strateškim pravcima Općine i drugim temama.

ONASA: Prema vašem mišljenju, koji su najčešći problemi s kojima se suočava općina Srebrenik?

BULJUBAŠIĆ: Najveći problem općine Srebrenik, kao i većine općina u BiH, su budžeti, koji su, po mom mišljenju, socijalno orijentisani i nisu razvojnog karaktera.

Ovdje se onda, svakako, nameće najveća problematika, a to je procenat nezaposlenosti.

Također, mislim da komunalnu infrastrukturu nismo razvijali prema prioritetima i realnim potrebama, tako da smo danas u poziciji da za veći dio općine Srebrenik još uvijek imamo neriješeno pitanje vodosnabdijevanja, kao i za cijelu općinu neriješeno pitanje deponije za odlaganje otpada.

ONASA: Na koje oblasti su fokusirani strateški pravci Općine i koji su preduslovi za njihovu realizaciju?

BULJUBAŠIĆ: Mislim da nismo dovoljno iskoristili prednosti kulturno-historijskog naslijeđa naše općine, (Tvrđava Gradina - 1333. godine, Ban Stjepan II Kotromanić i kralj Tvrtko I), u smislu pomoćne općine i stvaranja poslovnog ambijenta.

Također, još uvijek nemamo definisane poslovne zone za potencijalne investiture.

Strateški razvoj općine je baziran na malim i srednjim preduzećima, proizvodnog karaktera u oblasti građevine i mašinske obrade, te prerađivačkih kapaciteta prehrambene industrije.

Svakako, općina se razvija i u dijelu poljoprivredne proizvodnje, posebno u oblasti voćarstva, povrtlarstva i stočarstva.

Moramo u fokus staviti zadrugarstvo u dijelu otkupa poljoprivrednih proizvoda, kao i stvaranja simbioze sa prerađivačkim kapacitetima koja su promovisana još od postojanja preduzeća "Majevica" na području naše općine.

Mi smo već krenuli za stvaranje uslova za razvoj ovih djelatnosti u smislu formiranja poslovnih zona, smanjenja administrativnih taksi, kao i naknada za rentu i uređenje, te naknade za plaćanje utvrđene cijene korisne površine jednog metra kvadratnog stambenog prostora, podrška u dijelu subvencioniranja zaštite životinja, kao i dijela poticaja za poljoprivrednu proizvodnju u segmentima gdje se poticaji ne mogu ostvariti sa viših nivoa vlasti.



Grb Općine Srebrenik

"... lično smatram da u
ovakvoj organizaciji
države BiH, odnosno
Federacije BiH, kantoni su
organizacijski i finansijski
nepotrebni. "



Kula u Srebreniku

**KORISNI LINKOVI ZA PREDPRISTUPNE
FONDOVE EU:**

www.southeast-europe.net
www.adriaticipabc.org
www.interregadriatico.it
www.europa.ba
www.chib-eu.org
www.cbc.bih-mne.org
www.srb-bih.org
www.cbc-cro-bih.net
www.programmemed.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu

ONASA: Ko su nosioci privrednog razvoja općine i koje grane imaju najveće potencijale za ulaganje?

BULJUBAŠIĆ: Nosioci privrednog razvoja općine Srebrenik su privredni subjekti pomenuti u oblastima razvoja.

Općina ima potencijale u eksploataciji kamena i rudnog bogatstva, potencijal u turizmu, u smislu kulturno-historijskog naslijeđa, povoljnog poslovnog ambijenta, stvorenog smanjenjem taksi i naknada za građenje, te, svakako, minimalnim rokovima za izdavanje potrebne dokumentacije za registraciju obrtničke djelatnosti, (u kompletan zahtjev, rješenje se izdaje u roku od dva dana), kao i rokova za izdavanje građevinske dozvole (uz kompletan zahtjev, odobrenje se izdaje od dva do pet dana ovisno od objekta).

ONASA: Kakva je Vaša saradnja sa višim nivoima vlasti?

BULJUBAŠIĆ: Saradnju sa višim nivoima vlasti u periodu od preuzimanja mandata, 14. novembra 2012. godine, jako teško mogu komentarisati.

Međutim, lično smatram da u ovakvoj organizaciji države BiH, odnosno Federacije BiH, kantoni su organizacijski i finansijski nepotrebni.

ONASA: Šta očekujete od 2013. godine i u kojim segmentima vidite šanse za napredak općine?

BULJUBAŠIĆ: Nažalost, stanje izvršenja budžeta za 2012. godinu, uz iskazani deficit od oko 2,5 miliona KM, te obaveze prema dobavljačima od oko 3,2 miliona KM, na ostvarenje budžeta iz 2012. godine od 7,6 miliona KM, ne daju šanse za napredak, osim u segmentu ušteda koje bi vodile stabilizaciji ili, bolje rečeno, sanaciji budžeta.

Izgradnjom poslovne zone sa povlaštenim ustupanjem za potencijalne investitore, otvara se mogućnost za privredni napredak. Također, imamo i jako dobre projekte u oblasti turizma, već smo ušli u fazu realizacije određenih projekata prekogranične saradnje, počeli aktivnosti na realizaciji kapitalnih investicija vodosnabdijevanja, sanitarne deponije i tvrđave Gradina.

INTERNA PROVJERA SISTEMA KVALITETA U OPĆINSKIM SLUŽBAMA OPĆINE CENTAR SARAJEVO

SARAJEVO, 22. mart/ožujak – Tokom 20. i 21. marta/ožujka 2013. godine u 12 službi Općine Centar Sarajevo izvršena je redovna godišnja interna provjera funkcionisanja i unapređivanja sistema kvaliteta po međunarodnim ISO standardima, s ciljem poboljšanja kvaliteta usluga građanima.

Riječ je o 16. po redu internoj provjeri funkcionisanja i unapređivanja standarda ISO 9001:2008 (QMS-Quality management system), odnosno sedmoj po redu provjeri standarda upravljanja okolišem ISO 14001:2004 (sistem okolinskog upravljanja EMS – Environmental Management System).

Prema planu i programu internog audita, kojeg je odobrio načelnik Dževad Bećirević kao Q menadžer kvaliteta, izvršena je interna provjera u službama za: zajedničke poslove; privredu i finansije; prostorno uređenje i komunalne poslove; boračko-invalidsku zaštitu; lokalnu samoupravu; informatiku i informisanje; civilnu zaštitu; obrazovanje, kulturu i sport; stambene poslove; imovinsko-pravne poslove; rad, socijalna pitanja i zdravstvo; opću upravu.

Tim povodom održan je 21. marta završni sastanak članova Tima za poboljšanje kvaliteta, internih auditora i rukovodilaca općinskih službi.

Sastanak je vodila Jasna Beba, rukovodilac Tima, koja je kazala da je interna provjera obavljena u okviru priprema za redovni eksterni audit koji je planiran za 25. i 26. april/travanj 2013. godine.

Na završnom sastanku je Amir Muja, vođa audit tima, prezentirao rezultate iz preliminarog izvještaja provedenog audita, za koji je rekao da je proveden uspješno, uz partnerski odnos i u kolegijalnoj atmosferi.

Pri tome je naveo da tokom provjere u općinskim službama, koju su vršili timovi auditora, nisu uočene neusklađenosti sa normama ISO standarda.

Auditori su dali 27 preporuka za poboljšanja.

Tim za poboljšanje kvaliteta će izvršiti analizu izvještaja a preporuke će biti proslijeđene rukovodiocima općinskih službi, koji imaju obavezu da u narednom periodu usvoje konkretna poboljšanja pojedinih procesa u uspostavljenom sistemu upravljanja kvalitetom po normama ISO 9001 i 14001, navodi se u saopćenju Općine Centar Sarajevo.



Općina Centar Sarajevo





ZAVRŠENA DIGITALIZACIJA KATASTRA U OPĆINI CAZIN

U okviru modernizacije i podizanja nivoa efektivnosti i efikasnosti jedinstvenog organa uprave, u općini Cazin uspješno je završena digitalizacija katastra.

Kako bi se iskoristile pozitivne strane ovog važnog tehnološkog iskoraka, u općini Cazin ovih dana započela je testna faza upotrebe novog sistema u izdavanju kopija katastarskog plana i ostalih službenih isprava iz oblasti katastra.

Cazin je prva općina u Unsko-sanskom kantonu i jedna od prvih u Bosni i Hercegovini u kojima je izvršena digitalizacija katastra. Ukupna vrijednost projekta je 300.000 KM, a zajedno su ga finansirali Federalna geodetska uprava Sarajevo i Općina Cazin.

Radi se o procesu koji u prosjeku traje oko dvije godine. Ugovor o provođenju digitalizacije Općina Cazin potpisala je 2010. godine sa Federalnom upravom za geodetske i imovinsko-pravne poslove i do kraja 2012. godine je završena uspostava novog sistema. Kopiju katastarskog plana svaki građanin sada može dobiti za svega nekoliko minuta, a ranije je taj period iznosio od 5 do 10 dana.

Isto se odnosi i na posjedovne listove, uvjerenja i sve ostale dokumente koji se izdaju u općinskom katastru. Kako je ovom prilikom naglašeno, među ostalim prednostima digitaliziranog katastra je i bolja zaštita dokumenata, smanjena mogućnost zloupotrebe, kao i ostvarivanje preduvjeta za slanje podataka putem Interneta što će u konačnici omogućiti softver Federalne geodetske uprave. Općina Cazin ovim primjerom dobre prakse učinila je još jedan od važnih koraka u procesu ukupne modernizacije općinskog organa uprave i stvaranja kvalitetnijih uvjeta za život svojih građana u svakom pogledu.



Grb Općine Cazin

INTERVJU: EMIR BUBALO, NAČELNIK OPĆINE KONJIC

Razgovarao: Delvin KOVAČ



Emir Bubalo, načelnik
Općine Konjic

SARAJEVO, 19. MARTA (ONASA) - Načelnik Općine Konjic Emir Bubalo u intervjuu za Agenciju ONASA govori, između ostalog, o problemima i prioritetima u radu općinske vlasti, privrednom razvoju ove lokalne zajednice, stanju na tržištu rada, te radu Agencije za ekonomski razvoj "Prvi korak".

ONASA: Na čemu će biti akcenat rada lokalne vlasti u Konjicu u narednom periodu i koji su projekti prioritetni za ovu godinu?

BUBALO: Nastavićemo aktivnosti na implementaciji Zakona o principima lokalne samouprave u Federaciji BiH, a sve u svrhu jačanja uloge i značaja jedinica lokalne samouprave, kao i kontinuiranu i svrsishodnu reformu javne uprave. Također ćemo nastaviti jačanje regionalnog povezivanja putem uključivanja u projekte koje nude neki od evropskih pretpripravnih fondova, kao i jačanje partnerstva i razumijevanja u vezi sa strateškim državnim dokumentima i obavezama prema zahtjevima Evropske unije (EU), koje su bile osnov za izradu Strategije razvoja općine Konjic i

Projekat upravne odgovornosti u segmentu zaštite čovjekove okoline (realizacija Projekta prečišćavanja otpadnih voda - kanalizacija i izgradnja centra za zbrinjavanje komunalnog otpada).

ONASA: Koji su najčešći problemi sa kojima se suočava općina Konjic?

BUBALO: Suština problema je nejasna i nedovoljno izdefinisana nadležnost pojedinih nivoa vlasti, pogotovo u Federaciji BiH, gdje se isprepliću nadležnosti entiteta i kantona, dok su građani za rješavanje svojih problema neumitno upućeni na jedinicu lokalne samouprave, da li kao dugogodišnju inkorporiranu praksu ili kao najbližu vlast. Donošenje zakonskih propisa stvara takvu pometnju, najblaže rečeno zbunjenost, da ne kažem sumanutost ili zabezecnutost, da za ono za što si do ponoći bio ovlašten i nadležan, od ponoći to te više niko ne pita po predmetnim stvarima. To nije problem samo za jedinice lokalne samouprave, već samo po sebi znači i negativan stav potencijalnih stranih investitora, što još više utiče na bremenitost situacije u segmentu privrede, a samim time ima reperkusija i na ostale sfere života i rada kako pravnih, tako i fizičkih lica. Sve to zajedno, uz političke turbulencije, ima odraza na kompletan društveno-politički sistem BiH.

ONASA: Ko su nosioci privrednog razvoja općine?



Grb Općine Konjic

"Suština problema je nejasna i nedovoljno izdefinisana nadležnost pojedinih nivoa vlasti, pogotovo u Federaciji BiH, gdje se isprepliću nadležnosti entiteta i kantona, dok su građani za rješavanje svojih problema neumitno upućeni na jedinicu lokalne samouprave, da li kao dugogodišnju inkorporiranu praksu ili kao najbližu vlast."



Konjic

KORISNI LINKOVI ZA PREDPRISTUPNE FONDOVE EU:

www.southeast-europe.net
www.adriaticpachc.org
www.interregadriatico.it
www.europa.ba
www.cbib-eu.org
www.chc.bih-mne.org
www.srb-bih.org
www.cbc-cro-bih.net
www.programmed.eu
www.tacso.org
www.euroinfoentar.ba
www.balkanfund.org
www.eurelmed.com
www.eacea.ec.europa.eu

“Donošenje zakonskih propisa stvara takvu pometnju, najblaže rečeno zbunjenost, da ne kažem sumanutost ili zabezecnutost, da za ono za što si do ponoći bio ovlašten i nadležan, od ponoći to te više niko ne pita po predmetnim stvarima. To nije problem samo za jedinice lokalne samouprave, već samo po sebi znači i negativan stav potencijalnih stranih investitora, ...”

BUBALO: Nekadašnji veliki industrijski državni kompleksi, koji su bili nosioci razvoja općine Konjic - UNIS i ŠIPAD, kao i bezbroj drugih industrijskih giganta širom BiH doživjeli su svoju potvrdu neodrživosti, kako u smislu vlasništva, tako i prilagodljivosti kolebanjima na svjetskom tržištu roba, kapitala i radne snage. Zanimljivo je da prirodna bogatstva kojima obiluje općina Konjic, težnja ka stvaranju velikih industrijskih metalnih kapaciteta očito nije dala dobre rezultate, tako da je danas od "velikog Igmana - snage odbrane BiH od agresije" ostala samo lijepa uspomena. Nažalost, njen "ram" razbili su i oni koji su se trebali brinuti o svojoj imovini (Vlada Federacije BiH).

Od industrijskih kapaciteta metalne industrije jedino se zadržala proizvodnja valjčica za ležajevе, koja je nažalost suviše mala da bi predstavljala dobru osnovicu za razvijanje metalne industrije. Ratna dejstva i razaranja, kao i kasnija neadekvatna privatizacija, imali su za rezultat i posljedica "depoe otpadnog željeza", koji se bez značajnijih ulaganja u opremu, alate i stručne radne snage, te neophodne infrastrukture nisu mogli reaktivirati, osim što su kupovinu Tvornice vijaka obavili inopartneri.

Suočeni s nastalim problemima, sva pažnja usmjerena je na iskorištavanje prirodnih bogatstava općine Konjic, te su u tom smislu sačinjene i Strategija razvoja poljoprivrede, Strategija iskorištenja hidropotencijala i Strategija razvoja turizma. Svaka od njih imala je za rezultat i stvaranje pretpostavki, tako da su formirana mala poljoprivredna gazdinstva koja su po pojedinim cjelinama obrazovana kao udruženja.

U segmentu iskorištenja hidropotencijala, a shodno ovlaštenju Vlade Hercegovačko-neretvanskog kantona (HNK), Općina Konjic provela je proceduru i još davne 2005. godine dodijelila koncesiju za 38 malih hidroelektrana na rijekama Neretvica, Ljuta, Bijela, Kraljušćica, Baščica i Trešanica. Ali, nažalost, česte izmjene zakonskih propisa uslovile su da je do danas samo jedna mala hidroelektrana u pogonu.

U domenu razvijanja i stvaranja pretpostavki za razvoj turizma, napravljeni su značajni koraci u izgradnji infrastrukture (putna infrastruktura - izgrađeno, betonirano ili asfaltirano 306 kilometara, elektronska, telefonska, elektro i vodovodna infrastruktura - svako naselje na području općine, koja obuhvata površinu od 1.386,6 kilometara kvadratnih, ima i riješeno pitanje snabdijevanja vodom), a urađena je i značajna izgradnja turističko-smještajnih kapaciteta, kao i promocija vrijednosti lokalne kulturo-historijske priče o postanku i razvoju Konjica kroz prostor i vrijeme.

ONASA: Pokazuju li strani investitori interesovanje za ulaganje u Vašu općinu?


BUBALO: Postoji određeni interes stranih investitora, ali zbog izuzetno komplikovanih zakonskih propisa i trenutne političke situacije u BiH, prožete nesigurnošću ulaganja, vlasništva, svi kontakti završavaju se na formi traženja i dobijanja određenih informacija, tako da ozbiljnijih razgovora o tome praktično i nema, iako je procesom privatizacije njemačka kompanija "Grewе" u potpunosti preuzela pogon za proizvodnju vijaka (bivši UNIS TADIV Konjic) i dostigla prijeratni nivo proizvodnje. To do ovog trenutka nije dalo značajnijeg pomaka u segmentu pojačanog interesa stranih investitora.

ONASA: Raspoložete li podacima o broju nezaposlenih građana u općini i šta lokalna vlast poduzima na poboljšanju stope zaposlenosti, posebno mladih i obrazovanih kadrova?

BUBALO: Putem Zavoda za zapošljavanje, Općina Konjic dobija informacije o kretanju broja zaposlenih, odnosno nezaposlenih osoba, kao i o njihovoj kvalifikovanoj i starosnoj strukturi. Trenutna situacija u Konjicu dosta je teška, kao i u cijeloj BiH, a na to značajan uticaj imaju svjetska kretanja robe, kapitala i radne snage. Vrlo visoka stopa registrovane nezaposlenosti na području cijele BiH, pa tako i na području naše općine, kao jedan od najvažnijih ekonomskih indikatora, oslikava ustvari trenutno stanje privrede i ekonomije kako na području Konjica, Federacije BiH, tako i same države BiH.

Broj nezaposlenih na tržištu rada zavisi od ukupnog obima ekonomskih aktivnosti, a situacija u tom pogledu nije dobra i ne pogoduje otvaranju novih radnih mjesta. Uzimajući u obzir drastično smanjenje priliva stranih investicija u BiH u odnosu na region i na prethodni period, te pad kreditnog rejtinga BiH, opšte stanje na tržištu rada u BiH i dalje je veoma teško.

Prateći mjesečne izvještaje o kretanju nezaposlenih, tokom 2012. godine na području općine Konjic zabilježen je stalni rast učešća nezaposlenih koji su bili u radnom odnosu i korisnika prava na novčanu naknadu. S tim u vezi, na kraju izvještajne 2012. godine imamo povećan broj nezaposlenih na evidenciji Biroa za zapošljavanje za 83 nezaposlene osobe ili za oko dva posto u odnosu na prošlu godinu. Zaključno sa 31. decembrom 2012., na evidenciji nezaposlenih osoba biroa rada Konjic nalazilo se je ukupno 3.855 osoba, što je za 83 nezaposlene osobe više u odnosu na isti period prošle godine ili za oko dva posto.



Najveći doprinos smanjivanju broja nezaposlenih dalo je Privredno društvo (PD) "Igman" Konjic, koje je u izvještajnom periodu zaposlilo 150 osoba sa evidencije nezaposlenih. U isto vrijeme, broj zaposlenih na području općine u odnosu na prethodnu 2011. ima pozitivan trend rasta za 38 zaposlenih osoba ili za oko jedan posto. Prema posljednjim statističkim podacima, broj zaposlenih na području općine Konjic iznosi 4.459, što je u odnosu na 4.421 zaposlenih na kraju 2011. godine

više za 38, odnosno za oko jedan posto.

S obzirom na promjenljivu prirodu tržišta rada, koja podrazumijeva promjenu u ponudi s jedne, i promjenu u potražnji radne snage sa druge strane, očigledan je nesrazmjer između znanja i vještina koje posjeduju nezaposleni sa naše evidencije, a koje su stekli obrazovnim planom i programom, te znanja i vještina koje traže poslodavci. S ciljem približavanja znanja i vještina nezaposlenih i onih koje zahtijevaju poslodavci, neophodno je što veći broj ljudi uključiti u različite oblike dodatnog obrazovanja, odnosno doobuke, prekvalifikacije, dokvalifikacije i slično. S tim u vezi, Zavod je u toku prethodnih godina objavljivao veći broj javnih poziva čija je svrha da se nezaposlene osobe svojim znanjem i vještinama što više približe tržištu rada, odnosno da budu što je moguće više konkurentniji u ponudi radne snage.

Kao što sam već rekao da je veliki broj nezaposlenih problem cijele društvene zajednice, sa zadovoljstvom mogu konstatovati da se općina Konjic, na čelu sa općinskim načelnikom i Općinskim vijećem, i ove godine aktivno uključila u rješavanje problema nezaposlenosti na području općine, te u budžetu za 2013. godinu izdvojila posebnu budžetsku stavku za aktivnu politiku zapošljavanja. U ovaj proces je u toku izvještajne godine uključeno više od 100 mladih osoba sa visokom stručnom spremom, kojima je omogućeno odrađivanje i polaganje pripravničkog staža kroz volonterski ugovor uz sufinansiranje iz budžeta Općine Konjic. Ova aktivnost biće nastavljena i u 2014. godini.

ONASA: Možete li rezimirati dosadašnji rad Agencije za ekonomski razvoj "Prvi korak", koja je Odlukom Općinskog vijeća (OV) Konjic formirana sredinom prošle godine?

BUBALO: Agencija za ekonomski razvoj "Prvi korak" formirana je sa težnjom da se realizuju razvojni projekti Općine Konjic i njenih privrednih subjekata, osiguraju investicije, pripreme projekti za zahvatanje sredstava iz fondova EU, pruži pomoć malim i srednjim preduzećima i stvore kadrovski i svi drugi potencijali za daljnje jačanje i razvijanje investicionih potencijala općine. U tom smislu, Agencija je imala sastanke s privrednim subjektima razvrstanim po granama djelatnosti, istim ili srodnim, a sve u svrhu njihovog okupljanja i jačanja razvijanja međusobne saradnje i pomoći.


Općina Konjic investira sredstva za obezbjeđenje smještajnog prostora Agencije i na taj način stvara minimalne uslove za nesmetan rad. Značajan korak na tom planu predstavlja i početak rada prve visokoškolske institucije u Konjicu - Fakulteta za turizam i menadžment, tako da se spregom znanja i iskustva može napraviti mnogo.

ONASA: Da li je Općina pripremila određenu strategiju za ovu godinu kada su u pitanju protivpožarne mjere?

BUBALO: Koristeći iskustva iz prošlogodišnjih požara, koji su četiri mjeseca harali šumskim prostranstvima općine, a težeći ka prevenciji nastajanja prirodnih i drugih nesreća, Općina Konjic poduzela je značajne korake na jačanju kapaciteta Profesionalne vatrogasne jedinice (PVJ) u njenom materijalno-tehničkom i kadrovskom jačanju, a sve s ciljem jačanja i osposobljavanja pripadnika te jedinice za brzo i efikasno djelovanje u slučaju da se desi prirodna nesreća.

Ljudstvo PVJ Konjic upućivano je na dodatne obuke i osposobljavanje za djelovanje u slučaju nastanka prirodne i druge nesreće, uz istovremeno opremanje novom radnom opremom i sredstvima za neposredno i efikasno djelovanje na terenu. Općina je angažovanjem vlastitih i sredstava dobijenih od drugih općina povećala broj vatrogasnih vozila za brzo, kvalitetno i efikasno eliminisanje nastale prirodne i druge nesreće u zaštiti ljudi i materijalnih dobara.

Značajan korak predstavlja uspostavljanje saradnje sa privrednim društvima, prevashodno kompanijom Šumarstvo "Prenj" Konjic, koja je nadležna za pravilnu sječu, zaštitu i obnovu šumskih kapaciteta, a sve s ciljem efikasnijeg i bržeg i sveobuhvatnijeg djelovanja prilikom nastanka požara, klizišta, poplava i drugih prirodnih nesreća koje ugrožavaju ljude i materijalna dobra.



Konjic, stare razglednice



Konjic



ONASA: Šta općinska vlast poduzima na promicanju prirodnih potencijala u svrhu razvoja turizma?

BUBALO: Prirodni potencijali (šume, rijeke, jezera, planine, visoravni, kanjoni, šumski plodovi, čistoća gradskih i prigradskih puteva, naselja i drugo), kombinovani sa blizinom Sarajeva, Mostara, Međugorja, Jadranskog mora, predstavljaju kako privilegiju, tako i obavezu za Općinu Konjic da ih njeguje i iskorištava za razvoj turizma.

U svrhu jačanja turističke ponude, Općina ulaže značajna sredstva u razvijanje putnih komunikacija restauracijom i izgradnjom, te zaštitu kulturno-historijskog naslijeđa, zatim jačanje hotelskih kapaciteta i ugostiteljskih objekata sa percepcijom domaće kuhinje i šarolikosti bosanske trpeze, te neprestano jačanje svijesti o proizvodnji zdrave hrane.

Kada je u pitanju korištenje prirodnih potencijala, općina Konjic posjeduje rijeku Neretvu za rafting i ribarenje, Boračko i Jablaničko jezero za kampovanje, ribarenje, odmor i rekreaciju i svaki ugođaj kako domaćim, tako i stranim ljubiteljima čiste vode i prirode, objekat D-0 famoznog Titovog skloništa, koji obezbjeđuje održavanje bijenala - međunarodnu promociju Konjica, a tu su i kanjon rijeke Rakitnice i visoravni planine Visočice.

Prioriteti Općine su zadržavanje izvornog izgleda sela Lukomir, restauracija džamija, crkava i trganje od zaborava spomen-obilježja starih Bošnjana reparacijom stećaka, izgradnja Zavičajnog muzeja i, naravno, izgradnja jedne i neponovljive Kamene ćuprije, te vraćanje autohtonog izgleda dućana na obali Neretve, kao i očuvanje rodne kuće Zulfikara Zuke Džumhura.

Sve to dio je opusa na isticanju iskonske ljepote isklesane u prošlim i sadašnjim vremenima i ovog nam prostora pod svodom nebeskim, čaršije konjičke.

KORISNI LINKOVI ZA PREDPRISTUPNE FONDOVE EU:

www.southeast-europe.net
www.adriaticpacbc.org
www.interregadriatico.it
www.europa.ba
www.cbib-eu.org
www.cbc-bih-mne.org
www.srb-bih.org
www.cbc-cro-bih.net
www.programmed.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu

NOVA ULAGANJA U PREHRAMBENU INDUSTRIJU U ŽIVINICAMA

ŽIVINICE, 21. mart/ožujak – Firma 'Bingo' će uložiti oko 5 mil EUR u projekat izgradnje najsavremenije farme koka nosilja u Evropi, a time bi se trebalo zaposliti minimlano oko 100 ljudi sa područja Općine Živinice, saopšteno je na web stranici Općine Živinice. Naime, Općina Živinice je 20. marta/ožujka 2013. godine potpisala Ugovore o zakupu državnog poljoprivrednog zemljišta sa firmama 'Bingo', 'AC Star' i 'Elisa Berry'.

"Firma 'Bingo' će graditi farmu kapaciteta 100.000 koka nosilja, što je preduslov za gradnju plasteničke proizvodnje, te fabrika tjestenina i kekasa. U objektima vojnog skladišta Ljubače firma 'Elisa Berry' će izgraditi savremene rashladne uređaje i vršiti najveći otkup voća na Tuzlanskom kantonu, te će biti distributivni centar za otkup za cijelo područje sjeveroistočne Bosne i dvije ekonomske regije iz Srbije", kazao je načelnik Općine Živine Hasan Muratović.

Prema riječima Jasmina Osmanovića izvršnog direktora firme 'Bingo' otvaranjem farme bi se trebalo zaposliti minimalno oko 100 ljudi sa područja općine Živinice.

Šef odsjeka za poljoprivredu i prehrambenu industriju u Tuzlanskom kantonu Šarac Samid istako je da su Živine kada je u pitanju primarna poljoprivredna proizvodnja u posljednjih 10 godina zabilježile uspon.

„Imamo realizovan pilot projekt kada je u pitanju uzgoj povrća i tu postignuti dobri rezultati. Slobodno možemo reći da proizvođači jagode na području Općine Živine bilježe najbolje rezultate na području Tuzlanskog kantona, a uvećana je i proizvodnja mljeka“, istakao je Šarac, te dodao, da ono što je vrlo bitno za područje općine jeste da su u završnoj fazi potpisivanja Ugovora za državno poljoprivredno zemljište koje se nalazi na području ove Općine.



U TEŠNJU OD 11-14. APRILA/TRAVNJA SAJAM PRIVREDE "BIZNIS 2013"

U Tešnju će se od 11. do 14. aprila/travnja ove godine održati 9. Sajam privrede "BIZNIS 2013", na lokalitetu industrijske zone Bukva, u prostorijama firme "Madi" – nekadašnja "Sloga".

Generalni pokrovitelj Sajma je Općina Tešanj, uz pokroviteljstvo Vlade ZDK i Federalnog ministarstva razvoja, poduzetništva i obrta.

Ove godine sajam će posjetiti ambasadora Japana u BiH Hideo Yamazaki. Osim njih dolaze i ambasadori Turske, Crne Gore, Hrvatske, Mađarske, Albanije, Češke, Austrije, Slovenije i Makedonije.

Također, i premijer FBiH Nermin Nikšić najavio je dolazak, kao i zamjenica ministra ekonomskih odnosa i vanjske trgovine BiH Ermina Salkićević-Dizdarević.





JA BIRAM GOSTE SA VESNOM TRAVLJANIN

U dijaloškoj emisiji 'Ja biram goste' televizijske kuće TV1, koja je emitovana 21. marta/ožujka, gost urednik i voditelj bila je direktorica Saveza općina i gradova Federacije Bosne i Hercegovine, Vesna Travljanin, sa temom 'Položaj lokalne samouprave u sistemu vlasti Bosne i Hercegovine'.

Gosti u emisiji bili su:

- Njegova ekscelencija **BO WILLIAM HEDBERG**, ambasador Kraljevine Švedske u BiH
- **JASMINA ZUBIĆ**, zastupnica u Predstavničkom domu Parlamenta FBiH
- **MIRKO PEJANOVIĆ**, redovni profesor na Fakultetu političkih nauka Univerziteta u Sarajevu i zastupnik u Predstavničkom domu Parlamenta FBiH
- **HAMDO EJUBOVIĆ**, načelnik Općine Hadžići
- **IVO JERKIĆ INO**, načelnik Općine Čitluk i zamjenik predsjednika Predsjedništva Skupštine Saveza

Emisija je bila prilika da se javnost upozna sa izrazitim problemima sa kojima se suočava lokalna samouprava u FBiH, kao i o odnosu sa višim nivoima vlasti. Tako se govorilo o normativnim nedostacima koji uređuju nadležnosti lokalnog sistema vlasti kao što su Zakon o koncesijama, Zakon o šumama, Zakon o pripadnosti javnih prihoda, Zakon o turističkim zajednicama. Riječ je bilo i o zaduženju po Stand By aranžmanu sa MMF-om čija sredstva nisu koristile jedinice lokalne samouprave, a dok kroz sistem otplate vanjskog duga jednako učestvuju u njegovom vraćanju kao i ostali nivoi vlasti koji su korisnici tih sredstava.

Kompletnu emisiju možete pogledati preko web stranice Saveza na: www.sogfbih.ba



NALAS ANKETA: ISPITIVANJE POTREBA ZA IZRADU PLATFORME ZA SPAJANJE JLS I BIZNIS SEKTORA

Mreža asocijacija lokalnih vlasti jugoistočne Evrope (NALAS), u sklopu priprema za održavanje međunarodnog sajma lokalne samouprave - NEXPO 2013, koji će se održati 25. - 27. septembra/rujna 2013. godine u Rijeci i Opatiji, provodi "Studiju analize potreba" kako predstavnika lokalne samouprave tako i predstavnika biznis sektora koji posluju u području energetske učinkovitosti i obnovljivih izvora energije.

Rezultati Studije će osigurati preduvjete za kreiranje najkvalitetnije matchmaking platforme između biznis sektora i lokalne samouprave i na taj način pružiti maksimalnu korist za sve NEXPO sudionike.

Cilj stvaranja platforme je uspostavljanje održivog partnerstva između lokalnih samouprava i biznis sektora, što će pomoći razmjeni strategija i konkretnih projektnih ideja, te doprinijeti stvaranju partnerskih odnosa i ulaganja.

Da bismo postigli ovo, ljubazno Vas molimo da uzmete učešće u online anketi koja je dostupna preko web stranice Saveza.



NAJAVA SVEČANE CEREMONIJE DODJELE BEACON PRIZNANJA

Federalno ministarstvo pravde, Ministarstvo uprave i lokalne samouprave RS i Vlada Brčko Distrikta BiH, organiziraju svečanu ceremoniju proglašenja najboljih lokalnih zajednica u VII krugu Beacon Sheme BiH.

Sedmi krug Beacon sheme, koji ima za cilj prepoznavanje, promovisanje i nagrađivanje najboljih primjera iz prakse između općina u BiH, uspješno je priveden kraju.

Kao što je to bio slučaj i sa prethodnim krugovima, VII krug Beacon sheme privukao je veliki broj općina/gradova koje su se prijavile za učešće u jednoj ili više oblasti. Teme Beacon sheme za 2012. godinu bile su:

"Evidentiranje i upravljanje imovinom lokalne zajednice",

"Ostvarivanje strateških ciljeva kroz saradnju sa nevladinim organizacijama" i

"Energetska efikasnost u zgradarstvu – rekonstrukcija omotača zgrada".

Nakon detaljnog i objektivnog procesa odabira, kojeg su predvodili članovi Savjetodavne komisije, Beacon općine/gradovi za 2012. godinu uspješno su izabrane.

Ceremonija proglašenja najboljih lokalnih zajednica u VII krugu Beacon Sheme BiH će se održati 03. aprila/travnja 2013. godine u Hotelu "Jelena" u Brčkom sa početkom u 12:30 sati.

Ceremoniji će prisustvovati gradonačelnici/načelnici i predsjedavajući gradskih/općinskih vijeća u Bosni i Hercegovini.





**World Bank
Institute**

**KORISNI LINKOVI ZA PREDPRISTUPNE
FONDOVE EU:**

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmed.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu

WBI ORGANIZUJE ON LINE OBUKU 'ULIČNO ADRESIRANJE I UPRAVLJANJE GRADOVIMA'

Institut Svjetske banke (WBI) objavljuje početak *on line* obuke 'Ulično adresiranje i upravljanje gradovima' (Street addressing and management of cities). Kurs počinje 16. aprila/travnja i traje do 27. maja/svibnja 2013. godine, a angažman koji se očekuje od polaznika je oko 6 sati sedmično.

Cilj ove *on line* obuke je osnaživanje lokalnih kapaciteta za dizajniranje, sprovođenje i održavanje efikasnih programa za ulično adresiranje, jačanje svijesti o značaju adresiranja za upravljanje zemljištem, lokalni ekonomski razvoj i isporučivanje komunalnih usluga. Kurs je namijenjen zaposlenima u lokalnoj samoupravi, posebno u GIS službama, urbanizmu, ali i u javnim komunalnim i urbanističkim preduzećima.

Obuka se odvija na internet platformi kroz individualni rad, uz neophodno dobro poznavanje engleskog jezika. Rok za prijavljivanje je do 9. aprila/travnja 2013. godine.

Kroz Program Urbanog Partnerstva obezbijeđene su stipendije za odredjen broj učesnika iz regiona.

Da bi učesnici bili u mogućnosti da dobiju stipendiju, osim što treba da rade u lokalnoj samoupravi ili nekom od javnih komunalnih preduzeća, treba da dostave sljedeće:

- Kratko motivacijsko pismo (zašto je kurs važan za vas) i izjavu kako ćete stečeno znanje primijeniti na svom radnom mjestu.
- Razlog zašto ne možete platiti registracijske troškove kursa.
- Spremnost redovnog praćenja kursa i aktivno učešće.
- Potvrdu o znanju Engleskog jezika.

Za više informacija molimo vas da posjetite sljedeću web stranicu:

<http://einstitute.worldbank.org/ei/course/street-addressing-and-management-cities> ili kontaktirate Tamaru Nikolić na e-mail: tnikolic@worldbank.org

LAF STUDY TOUR ON EU ENTREPRENEURSHIP AND SME POLICIES AT LOCAL LEVEL

U okviru programa Local Administration Facility (LAF) organizuje se studijska posjeta Briselu pod nazivom „EU poduzetništvo i SME politike na lokalnom nivou” (LAF Study Tour on EU entrepreneurship and SME policies at local level) koja će trajati od 22. do 24. maja/svibnja 2013. godine.

Cilj studijskog putovanja je pružiti priliku lokalnim i regionalnim predstavnicima za upoznavanje sa ovom oblasti u zemljama EU. Također, imat će priliku da razmijene svoja iskustva sa kolegama iz zemalja EU.

Studijsko putovanje je otvoreno za učesnike iz Zapadnog Balkana (Albanija, Bosna i Hercegovina, Hrvatska, Kosovo, Makedonija, Crna Gora i Srbija) i Tursku. Maksimalno po šest učesnika može biti izabrano iz svake od zemalja Zapadnog Balkana.

Aplikacija treba da sadrži popunjen prijavni formular, pismo interesa i CV. Zainteresovani kandidati treba da pošalju CV i pismo motivacije (sa detaljima njihovog obrazovanja i profesionalnog iskustva i na koji način će dalje da prenose informacije sa ovog studijskog putovanja). Prvi pregled pristiglih aplikacija obaviće EU Delegacija u BiH. Aplikacije treba da se šalju na adresu: DELEGATION-BIH-TAIX@eeas.europa.eu

Izbor kandidata vršiće Generalni direktorat za proširenje zajedno sa program menadžerima Delegacije Evropske unije u BiH.

Jezik studijskog putovanja je engleski pa je stoga aktivno znanje engleskog jezika preduslov za učešće. Učesnici će biti direktno kontaktirani od strane kancelarije Generalnog direktorata za proširenje, pa stoga je bitno da kandidati navedu direktan broj telefona u prijavnim formularu. Znanje engleskog jezika je važno zbog praktičnih vježbi gdje će biti traženo učešće svih polaznika. Studijska posjeta organizuje se za učesnike koji nisu do sada bili dio LAF događaja ove vrste.

Krajnji rok za podnošenje prijava je 18. april/travanj 2013. godine.

Sve potrebne formulare za prijavu možete naći na web stranici Saveza.

U slučaju da imate bilo kakvih pitanja u vezi sa aplikacijom, molim Vas kontaktirajte gđu. Esmiru Kešan na: esmira.KESAN@eeas.europa.eu



**Savez općina i gradova Federacije
Bosne i Hercegovine**

Musala 5/1
71 000 Sarajevo

Phone: ++387 33 216 502, 209 024, 209 120

Fax: ++387 33 552 810, 552 811

E-mail: dino@sogfbih.ba

Nađite nas na facebook-u



POSJETITE NAS NA WEB-U

WWW.SOGFBIH.BA

OPĆINE KOJE OBILJEŽAVAJU SVOJ DAN U MJESECU APRILU/TRAVNJU

- **06. april/travanj - Dan Grada Sarajeva** i obilježava se kao sjećanje na oslobođenja grada 1945. godine.
- **06. april/travanj - Dan Općine Breza.** To je dan oslobođenja Breze od fašista iz II. svjetskog rata 1945. godine.
- **15. april/travanj - Dan Općine Kakanj.** Radi se o prvom spominjanju imena Kakanj u pisanim izvorima. Na taj dan 1392. godine kralj Stjepan Dabiša darovao je vojvodi Hrvoju Vukčiću dva sela u okolini Kaknja. Općinsko vijeće Kakanj je 14. marta 1996. godine odlučilo da se 15. april proglasi Danom Općine Kakanj.
- **28. april/travanj - Dan Općine Vitez.** Ovaj datum se obilježava kao dan Općine jer je tog dana 1952. godine Narodna skupština NRBiH donijela Zakon kojim je formirana Općina Vitez.



Sarajevo



Breza



Kakanj



Vitez

Poštovani čitaoci,

putem ovog biltena pružamo Vam mogućnost da se informišete o aktivnostima Saveza, o bitnim dešavanjima u općinama i gradovima, aktivnostima naših partnera, institucija vlasti, kao i o razmjeni najboljih iskustava i praksi.

Na ovaj način Vam, također pružamo informacije o održanim konferencijama, seminarima, radionicama, okruglim stolovima, javnim raspravama, o održanim sjednicama organa i tijela Saveza.

Ukoliko želite da se prijavite za primanje ovog biltena možete to učiniti tako što ćete poslati e-mail na: dino@sogfbih.ba

Molimo vas da informacije o našem biltenu prosljedite svim u vašoj i susjednim općinama i drugim zainteresiranim.

Ukoliko želite da objavite neke od vaših novosti, iskoristite bilten Saveza, koji je brz i efikasan način komuniciranja.

Sa zadovoljstvom očekujemo vaše komentare, sugestije i primjedbe.